

敦煌随笔

地180  
9346

图整库

欽定皇極經世一

邊疆禁書甲集之六

中華民國二十六年四月禹貢學會  
會館傳鈔本印



# 敦煌隨筆序

耳目之於人也耳司聞目司見其爲用則同然聞貴乎擇見則識之於心用其所聞與用其所見等用也而爲效不能無殊傳曰所見異辭所聞異辭所傳聞又異辭於以知見見聞聞之不可同年語也明矣天下郡邑所在莫不有志志者記也大都取資文獻網羅舊聞或以精核見長或以淹博取勝其究也世殊事異往往耳之用宏而目之用短理勢相因有固然者安西僻介沙漠建設未久乘載闕如余承乏茲土三年以來鹿鹿於簿書期會鞅掌不遑深慚龔鄙無文弗克以編纂自任偶采集舊聞新得爲敦煌雜鈔雖略見沿革建置山川城堡之大凡而於形勢險要疆域道里風土人情民俗吏治未遑縷述也間嘗於巡歷所至轍跡所經諮諏所及按之圖說徵之輿論其今昔之異宜見聞之殊致者輒隨筆記之歲在壬戌復加釐訂分類編叙節錄現在經理事宜數條并附碑記一二首列爲兩卷卽以隨筆名篇是猶螢火之光祗堪自照既不敢貴耳而賤目亦庶以所見證所聞僅免勦襲雷同以訛傳訛而已惟望大方家進而教之時壬戌嘉平臘日可園常鈞識

敦煌隨筆目錄

卷上

赤金

靖逆

柳溝

小灣

安西

瓜州

回民五堡

沙州

哈密

卷下

形勢論

敦煌隨筆目錄

一

禹貢學會  
邊疆叢書

戶口田畝總數

積糧

屯田

開渠

黨河源流

添築安西東關護牆

酌給安西城內隙地建蓋民房

添設要站引墩

# 敦煌隨筆卷上

葉河 常 鈞 和亭氏 纂

赤金

肅州至嘉峪關七十里出關西行一望荒沙大磧風日蒼涼悄然有鄉國之感四十里至雙井子赤金與肅州交界又五十里至惠回堡有回回墓因字音相近易今名赤金營千總分駐自此過驢馬城至火燒溝三十里又四十里至赤金湖又二十里至赤金所治在官道稍南乾隆七年復設衛新舊兩城東西連築南北兩門舊南門如故衛備與都司公署俱在新城內衛境東北有花海子與湃帶湖相連多水草有舊河一道在城南順山西流康熙五十六年間築堡招民開墾頭二三四渠引流輪灌田畝城南八里有紅山西湖環其麓其山土色赤故名山有寺頗具勝概又西南由上赤金南至野馬兔口有邊牆關門門東有水溝一道設立木柵自此出口踰南山通青海諸路再野馬兔迤東一帶又有鴉兒河白楊河青頭山諸隘口俱係控扼西寧青海咽喉其惠回堡東北之後柳灣墩及花海子北面迤西之頭二三四墩亦沿邊之要隘也自衛城至北門西行二十里至赤金峽又四十里至高見灘其

敦煌隨筆卷上

赤金 靖逆

一

禹貢學會  
邊疆叢書

西爲赤靖交界處

靖逆

由赤金湖四十里至赤金峽又西行郭壁中地無水草曰郭壁九十里至靖逆之大泉向時客民所居漸成市集來往殷繁俗稱泉子西南至衛治三里本達兒兔地方康熙間靖逆大將軍富公統兵駐此五十七年始築衛城因改名靖逆設衛與通判遊擊同城駐劄今接築新城添設副將建造官署兵房改游擊爲都司即居於舊署新舊兩城俱開南北門又分駐靖協守備於塔兒灣在衛北三十里衛境西南有昌馬河東南有疏勒河皆發源南山昌馬河東北流至上龍王廟與疏勒河合復歧爲二分東西而北流靖人總稱昌馬河其一支從東北流者築大東渠中渠西渠灌溉戶民田畝又從西渠之尾回民引水西北流入舊黃渠嗣因回民水澤不敷乃於舊渠之北築磨菇溝渠并引三道柳條溝之水西流入新黃渠河之南又有十道柳溝頭二道屬靖逆三道爲靖柳交界四道以至十道屬柳溝衛而昌馬河一支從西北流者散入頭二三道溝滙新舊兩渠之水統歸大河惟四道溝水勢最旺乃昌馬河入趨柳屬橋灣之故道至此合爲一河人呼疏勒河不復呼昌馬河矣此十道柳溝皆係泉水每年夏間南山雪水融發分注各溝大小不等尾流十河而河流愈大由橋灣經布隆吉雙

塔堡小灣廻抱鎮城之北而西達於瓜沙之境此疏勒河之源流也塞外戶民回民田地皆賴此河分渠引灌其澤甚溥十道柳溝一帶田疇彌望渠水通流屯墾之利日以興盛衛境西南黑打坂之昌馬墩圓墩子鱓泉子等處係通西海要路西海即青海山徑崎嶇俱築有墩臺派兵防範北有布魯湖花海子而沿邊之五墩以至十四墩皆靖逆所屬也余因塞外流移老弱孤貧之輩無以餬口於乾隆七年捐設義田一在靖屬之二道溝令靖赤二處就近動用一在柳屬之雙塔堡令安柳二處就近動用詳見碑文

附安西捐設義田碑記 爲捐設義田養濟孤貧報明立案以垂永遠事竊惟恤孤字寡王政所先因地制宜民依爲重安西孤懸塞外向無額設孤貧口糧流寓貧民餬口維艱殊甚惻憫地方官雖暫爲顧濟終非經久之道本道目擊情形細籌長策因柳靖二處爲安哈衝途隨查水泉有餘之地捐備工本於柳屬之雙塔堡墾地二百二十畝靖屬之二道溝墾地二百三十畝共墾地四百五十畝計下籽種九十石每處各建倉房三間給車十輛牛十隻馬二匹一切農器俱全設爲義田分撥柳靖二衛招佃殷實戶長領種酌借籽種口糧秋後收糧除清還官借各項外餘糧酌歸戶長工本下剩核明確數仿社倉例存貯各該處責成戶長經理爲養濟流寓孤貧之項該衛每月確查境內實在貧民若干按日酌給口糧卽於

敦煌隨筆卷上

靖逆 柳溝

二

禹貢學會  
邊疆叢書

義田存糧內動用親身散給季底造冊報明道廳查考歲底核明總數由廳報道存案毋許冒濫捏飾其安西赤金二衛有貧民需糧之處安西應在雙塔堡就近動用赤金應在二道溝就近動用一例造報仍令各衛等互相稽查該管廳員留心察核務使獨無告之流均沾實惠誠恐年遠無稽漸致湮沒當經詳允辦理勒石以垂永久并飭該廳衛等實力奉行隨將捐備各項造冊移司轉報存案一面檄發柳靖二衛遵照辦理復據沙州衛陳捷仿照捐設義田詳允一例遵辦從此五屬流寓貧民各得其養無虞失所相應勒石昭示來茲惟願賢有司等善爲經理俾塞外流移永沾惠澤本道實有厚望焉乾隆七年歲次壬戌秋七月立

柳溝

由靖逆大泉至三道溝五十里又五十里至八道溝此二處人烟稠密坊店寬敞其四道溝之北柳溝衛舊堡在焉東南至三道溝二十里西南至布隆吉七十里布隆吉本屬夷語譯音曰瀾言水泉多也作一四道溝原係昌馬河故道水勢最旺自靖逆於河口築壩偃水東流柳民以灌溉無資爭訟於官雍正七年勘照柳靖戶口多寡以八分歸靖二分歸柳至下龍王廟五里各開渠口照股分水嗣是頭二三道溝之間增開地畝靖逆以西亦資水澤聽其分流入頭二三四

道溝而河口舊壩不復經理然四道溝之水寬深仍倍於諸溝柳屬戶民田畝附近舊堡者即於四道溝分開三渠其餘丁地畝附近布隆吉者於十道溝尾開渠引灌而回民田地之在踏實堡地方者則係石包城一帶水泉此柳屬水利之大略也自八道溝而西四十里至布隆吉即安西鎮舊城雍正元年築開四門中建鼓樓規模雄壯自東門外關廂以至東北西門內大街俱爲市廛貿易所聚城基因低窪鹹潮牆垣多致塌損經岳督院奏明將城工動用銀糧著落承辦官賠補另安西鎮建城於大灣拆毀官署兵房材料運交安瓜兩處工程添用遂移柳溝衛於布隆吉與遊擊同城因城垣屢報塌損奉文擇地另建今已歸入善後事宜緩工內辦理城東北四十里至橋灣堡西爲哈密首途東通布魯湖接連十四墩其十五六七八九二十墩各相距二三十里不等以柳溝都司移駐稍偏西北有永寧廟西寧喇嘛住持城西南一百五十里爲踏實堡有都司分駐先屬沙協今隸安提統轄正西三十里爲雙塔堡有千總分駐又西五里雙塔歸然參差夾道地名雙塔兒又西十里則安柳交界也堡東南自平口子接連靖界起至西南一帶有可可克特利納木度克兒烏蘭布喇巴爾口亦馬口以及踏實堡管之破城墩紅柳邊路通安沙最爲扼要其西南之水峽奔巴兔正南之石包城東南旱峽皆崎嶇小徑直達青海現在各設卡倫防守

小灣

小灣者別於大灣之稱也疏勒河過橋灣直趨而西至此而北折故名小灣又西流廻抱大灣之北以達瓜州由布隆吉過雙塔共九十里至小灣其地流水淪連叢木縈帶風景頗可觀回民耕牧力作者趾踵相錯矣昔年官道在河北走郭壁過北乾溝南至於大灣每遇河水暴漲車馬艱於濟涉乾隆四年改從南道由安家窩鋪西赴大灣行旅便之小灣係鎮城布隆吉適中之地南隔南山北阻大河戶民零星散處商賈絡繹往來實爲東西孔道安柳咽喉乾隆三年瓜州札薩克公額敏和卓請於小灣建築回民土堡就近耕作部覆准行若築堡之後此地屯聚回民二千餘口雜處喧闐所資彈壓稽查關係尤重續經衛估報奉尹督院批令暫緩再待熟籌是以至今尙未建築其安家窩鋪之北則爲大渠口一曰南渠引水至瓜州以南蒙古包三十里井子一曰北渠引水至瓜州五堡而南渠迤東又有新渠引灌小灣田地以上渠水皆回民需用乃於北渠之間別開餘丁渠一道析爲支渠灌大灣近城丁戶地畝至西樹窩而止所稱大渠口者乃築渠分渠之總匯也余於庚申夏觀苗過此流憩河濱因相度地勢於渠北建龍王廟以爲祈報之所云

附觀苗圖記

苗者百穀所由成生民之大命然其成穀也有數而待食者無窮是故爲農

者不憚胼胝之勤苦爲政者當知稼穡之艱難安西介在沙漠巖疆初關設鎮守派駐防官與兵之待食者居其一勞來安集通工惠商民之待食者居其一分置兩廳衛所統以監司官之待食者居其一其他如府吏胥徒流移傭作之輩并嚮時安插土魯番回民則待食者且不一而足矣况塞外氣候恒寒多風少雨惟賴南山積雪融注河流以資灌溉曠土雖多水泉不足而民無土著遷徙不常兼之物力孔艱物價騰貴是天地之美利尙未盡興也戶口之滋息尙未盡蕃也閭閻之生養尙未盡遂也官斯土者可不加之意乎乾隆己未秋八月余來敦煌審度時勢竊以邊防重地足兵爲要足食爲先積貯與屯墾相爲表裏籌邊之務莫亟於此卽於是冬議請採買積糧十萬石以實倉儲所有鎮兵原種屯田莫若改歸民種將屯兵全撤以實營伍以備差操此兵食兩足之道也明年春奉檄查辦兵屯原地八千餘畝並清釐餘地以及開渠增墾新地共七千畝有奇親率丞倅備弁等招集客戶人民分土授墾區畫一切咸得乘時播種無悞東作而安西屯墾之利日以增粟且日以積於諸待食者有賴然猶慮新招戶民勤惰不齊工本不等鄉長戶長董率或未力有司勸導稽察或未周何莫非使者責歟乃以薄書之暇簡騶從歷溝涂觀其疆理之宜南東之勢或或芟芟竟畝如一農夫野老以及纏頭回民往來瞻顧嬉然和樂爰進髦士而詔之曰咨汝衆幸值

塞垣寧謐刀牛劍犢饁餉耕耘相安於作息之常得以飽食煖衣室家歡聚是皆上賴聖天子德威文教洽被乎遐方重農敦本子愛厥氓而封疆大臣罔不厪念如傷謀所以休養生息者無所不至汝民不憚胼胝之勤苦使者敢忘稼穡之艱難且願同事諸君子慎終圖始以共體此意也因命工繪圖而爲之記觀斯圖也可以知邊備之所先民生之不易矣

小灣大渠口新建龍王廟記 粵自五嶽四瀆載在祀典龍王廟偏海內祭法云能禦蓄捍患則祀之禮也雍正間勅頒內府監造法像於直省會城以肅觀瞻典綦重矣而廟在府州縣屬者地方官春秋朔望奉事惟謹安西僻在塞外建設未久祠祀缺焉己未秋余奉命分巡明年總理屯務疏川導流因詳求水利之原委安西有河曰疏勅其名舊矣流從靖逆之東南又有昌馬河從西南來二河皆發源南山至上龍王廟會合復分爲二一支東北流分三渠以灌靖民地畝其一支繞靖逆城西迤北過柳溝所屬之橋灣而靖柳之磨菇溝十道柳溝諸水皆入於河柳靖所屬資以灌田者且四萬三千餘畝河水自橋灣西流至小灣而北折此地建有回民南北二渠並餘丁渠因而折爲支渠不可勝紀分灌安西衛屬民屯回屯田地共五萬千有餘畝其小灣大渠口地名安家窩舖則係築壩分渠之總匯也向設水利把總率領渠兵一百名渠夫五十名就近築小堡居住專司挑濬防護修築之事河濱有

土宇數椽則水利弁兵所建以供奉龍王神位者余因禱祀至焉見其湫隘卑陋殊不稱慨然歎曰民之生命繫於苗苗之暢茂關於水况沙漠斥鹵之地莫重於水利而籌邊之計尤以屯墾爲先邇年以來雷雨奮盈水泉充足歲收有入民用平康繫誰之賜而廟貌弗飭豈徒守土之羞毋乃祈報有闕以貽神恫乎乃周視原隰於舊廟之西稍北得坦夷爽塏之地一區捐貲倡率木植磚瓦次第興作乃建享殿三楹東西分列配殿崇垣高門翼如煥如登其堂像飾威靈采繪雄麗亦塞外之觀瞻也由是神有憑依而益降之福官民咸知所欽仰不敢褻越以貽羞水之有源猶木之有本將日引月長流衍無疆之慶矣是工經始於辛酉以迄於壬戌越兩載而告成自都督寶公斌參戎郎公建業暨三營遊都守徐公嘉蘭等以及兩廳五衛之官皆樂助以襄盛舉董厥工者水利把總趙有功也因紀其事而泐之於石云乾隆七年冬十月記

安西

由小灣西行七十里至大灣安西鎮城在焉雍正五年築鎮署今改駐提督與安西道署東西並峙城之中建鼓樓爲四達之衢南北西三門無關廂惟東關廂及城內大街爲市廛貿易之所城北稍東爲安西衛治新建城守都司衙署兵屋俱在城西北隅近城內外絕少樹

木緣當年建置之初採伐殆盡近從口內購買柳椿種植澆灌不能長成地土鹹鬆時而墮踊雖衙署民居院落中亦如官道浮土壘集遇風則塵埃蔽空帷箔不能禦也終歲雨澤頗少雷亦稀聞惟賴南山融雪會合諸泉流入大河分築渠壩引灌地畝農人亦不以無雨爲憂近年以來亦有雷雨而壬戌之夏更多四時多風風緊則春夏作冷風狂則晝夜怒號甚至五七日十餘日不息沙磧路迷行人阻絕間有人馬飄忽不知其處者庚申孟夏陡發黃風閏六月朔又有紅風俱從西北來如推山倒海頃刻昏暗舉目無覩白晝燃燈風之爲厲甚矣邇年亦稍平靜余於壬戌秋始建風神廟於城西詳見碑記塞外氣候恆寒雖盛夏早晚亦涼春秋常御棉衣或披裘褐冬日嚴寒更甚於口內屯民每歲收割後卽之餘水灌田上凍俗稱澆冬水仲春氣暖冰融草木萌動農功畢舉惟上冬多雪至夏暑甚則積雪融化水澤充盈豐收可望否則難免歉薄且斥鹵之地土性燥烈若當春遇雨鹹氣上蒸土皮凝結須重複芟犁農工倍苦或夏秋之間忽雨忽晴加以熱風薰揚則黃丹蟲災有所不免最忌早霜傷禾更種亦有開種地畝二三年後地力淺薄勢須停耕者僅可聽民另覓可墾之地補種非官法所能督查邊疆初設向無土著民人皆係陸續招集及從前軍興時買遷有無挾資重獲而花消無存羈栖流落者或爲農或爲兵或託跡工商或投充胥役或依栖傭

作以餬其口間有挈帶眷屬營立家業者惟是沙漠荒僻物力艱難田禾以小麥青稞爲主歲止一收間或種糜粟豌豆如黑豆綠豆則絕無矣糧價雖比軍需時大減然中收之年每市石猶約在四五兩上下需用粳糯米須從肅屬之高臺買運來安每石價銀約至七八九兩凡布帛絲絮日用器具食物等類不但貨物低醜其價值較內地或三五倍或八九倍不等木則有紅柳沙棗野梧桐草則有芣其蘆葦駱駝刺獸則狐兔黃羊青羊大角羊野猪牛騾駝馬各種鳥則鷹雉燕雀倭鷗沙雞別有半翅似雉而小鴉聲尤惡無喜鵲見者以爲瑞湖灘亦產無鱗魚不堪食蔬菜有蘑菇葱蒜韭白菜芥菜王瓜菠薐蘿蔔然鎮城不廣有恆販鬻於沙州藥材則以枸杞甘草爲最官民炊爨燒炕純用木柴近年剝挖過多求覓漸遠將來必致樵蘇莫繼又有瑣瑣木然爲炭較梧桐木炭堅實雖所屬間有產煤之處亦可代薪而人情狃於習俗趨便辭難未便過爲督責勢之所至當不令而行也

附安西新建風神廟碑記 蓋聞大塊噫氣其名曰風於卦爲巽於行爲土於文爲蟲於類爲虎所以宣天地之德導陰陽之和滌煩散鬱噓枯吹生養萬物而成歲功者也若夫春則有惠風夏則有薰風秋則有清風冬則有寒風因其時而異用南風謂之凱東風謂之谷西風謂之泰北風謂之涼隨其方而別名或柔風披拂或熱風薰蒸或清風澹蕩或陰風慘悽

敦煌隨筆卷上

安西

六

馮貢學會  
邊疆叢書

或長風飄忽或高風扶搖或協風從律或盲風爲災斯固風色之殊致良由氣化之不齊雖然嘗考黃帝風經有云調暢祥和天之喜氣也折傷奔厲天之怒氣也詩曰敬天之怒毋敢戲豫敬天之渝毋敢馳驅昔帝舜納于大麓風雨弗迷周公居東風雷示變洪範推庶徵之休咎一曰聖時風若一曰蒙恒風若雖曰氣化豈非人事哉安西屬在沙漠荒僻遠節氣迴殊於內地其爲風也往往連昏曉洩旬時飛沙揚礫發屋抉樹甚至黃赤異色晝夜不分夏而炎熇冬而臙發春秋之間亦無寧息其來舊矣我皇上本中和位育之德繼承不緒敬天勤民懷柔百神聲教訖於無外塞垣寧謐屯墾日興山川效靈風雨時節忝茲守土莫不默荷神庥而祠宇未建獻享無聞非所以答嘉貺也况風雲雷雨之神載在祀典內地郡縣壇壝攸崇惟茲新設巖疆於諸祠祀闕焉未備余蒞事之三年熟察風土情形竊以崇德報功守土者所有事祠宇之建容可緩乎乃於城隍廟西偏規度善地周以繚垣南向樹屏表正方位中爲享殿三楹崇奉風神之像而於廟垣之東闕爲門闕與城隍廟相通卽令原招住持僧人並司啓閉主香火是役也經始勿亟因民之利而不勞簡樸無華損上之財而不費俾官吏兵民歲時朔望虔恭奉事各修其職業潔其身心勿作淫厲貽神羞庶邀上天降鑒而錫之祉福惟神亦能扶祐邊方布和行惠不失時節永無凌厲暴疾之虞將養物成功

於是乎在以副聖天子懷柔百神至意豈不休哉余不敏敢述創建所由勒之於石昭示來茲明乎天人感應之機至微而實著書傳所載信而有徵也至若考祀典立壇壝次第舉行是所望於後之君子乃爲之歌曰風之來兮于何從風之逝兮于何終清大漠兮鼓鴻濛維時若兮成歲功殿堂敞兮饗祀豐祈且報兮無怨恫官之守兮省厥躬民之勤兮矢厥忠於戲神之惠兮永無窮時乾隆七年歲次壬戌冬十月吉旦

### 瓜州

由安西城西南三十里至瓜州俗呼岳城雍正十一年築開東西二門有安西同知瓜州參將與照看回民之部郎筆帖式駐此南至瓜州口子三十里至南山之麓三十里北至疏勒河濱三十里又至白墩子九十里東至小灣一百里西至新百齊堡三十里有把總分駐其舊堡原在瓜州西北自改移南路遂成荒僻之地今於舊堡之東二道林築墩派兵巡哨瓜州除回民五堡及蒙古包三十里井子回屯之外皆係地方官營汛所轄並無與回民分定界址此地田地肥饒水泉充裕宜麥稞漢書地理志註云敦煌古瓜州地生美瓜故名狐入其中不見首尾今回民俱種植瓜果兼牧獵之利以供食用間有隙地居民亦種哈密瓜其圓而大者俗呼回回帽小者呼回回眼其瓢有青黃白三色俱鮮美然安沙諸處以及肅州之金塔寺亦有之終不及哈密者尤良種法以苦豆枝葉墊土中培壅其根夏末秋初成實白露前後採摘若雨水過多其味減薄城西北十里許與二堡相近之處有札薩克公果園城之北面分築五堡距瓜州六里以至十餘里遠近不等東西環列焉

### 回民五堡

土魯番纏頭回子即唐時回紇遺種言語不通衣服不類其文字與內地回民經典相似禮拜把齋過年儀節日期相同尊卑齒序稍有分別男女自行擇配有不合撮土一颺夫婦遂離異雖其父母頭目亦莫能禁男子雜髮如僧婦人辮髮極細分披眉脊間善製烏槍刀刃裝飾不甚精工婦人頗知紡織更以五色線刺繡手巾大酋長居屋多築臺居住今瓜州哈密札薩克公居宇猶仍舊制其俗殺人者多不抵命量死者強弱議罰牛羊多寡不等聞彼地從前約有十萬餘衆分住十七城堡服屬於準噶爾歲有輪納及準噶爾犯順遷其可汗蘇爾坦并大小頭目回民數萬餘口入伊里之野爾幹等處將各城堡焚掠殆盡有渠酋拖克拖馬木忒率衆內附安插於肅州之威虜堡後額敏和卓亦願遷移近地時提督顏清如護其衆來歸男婦大小不下萬口初暫住哈密之塔爾納沁於雍正十一年安插瓜州分築五堡居之封額敏和卓爲輔國公頒給札薩克印信俾總領其衆居住頭堡稱札薩克公扎

薩克者總頭目之名號也其餘頭目因彼地從前積有工苦分次一三三四等者照番民土司之例給與正副千百戶職銜劄付分領部落散居各堡頭堡則扎薩克公并所部魯古慶泗爾堡二堡則有哈喇火州木兒兔三堡則有蘇巴什勒木津小阿斯他納皮粘述桂四堡則有塞水津洋海土城溝五堡則有土魯番阿斯他納雅圖漢墩惟頭堡周圍三里七分餘俱二里一分各如其戶口之多寡蓋造房屋約計安插以來搬移之費賞賚之需以及馬匹驢騾牛羊口糧籽種農具并築堡授廩分田定地前後在於安家窩鋪磨菇溝開渠築壩等項不啻數百萬金原給有瓜州三十里井子一帶五千石籽種田地續又增給蒙古包三百石籽種地東至小灣二千石籽種地南至踏實堡七百石籽種地共給八千石籽種計地四萬畝令其自耕自食免納糧草及一應差徭又賣給瓜州附近一千石籽種地種植瓜果所有新舊渠道及水利弁兵渠夫人役係安西同知管轄調遣而一切屯務皆係安西鎮管理每年派委鎮標並瓜州將弁兵丁督種秋收聽其隨時割碾食用通盤合籌具報收成分數雍正十二年因旱薄收賞給缺少口糧一萬五千餘石十三年收成歉薄借給籽種口糧共一萬二千石運糧腳價銀二千二百七十餘兩乾隆三年奉旨將此項銀糧全行豁免累年以來據報收成較之鎮屬舊糧兵屯及各衛所民屯分數遞減乾隆四年大稔共收各色糧五萬一千三百餘石除一歲口糧及來春籽種共三萬四千七百餘石尚餘糧一萬六千六百餘石五六七等年雖收成豐歉不齊除口糧籽種總有餘剩糧石以及添補衣服購買牲畜茶油等項均屬敷用

### 沙州

由瓜州之西經蘆草溝甜水井圪塔井至沙州計二百五十里關外諸衛地處極邊而沙州孤懸天末更北可可砂石等處爲哈密東南捷徑西南通哈馬兒打板羅布腦兒伊里路徑東南直通柴達木青海諸路巖險尤甚地土衍沃物產饒多商民輻輳雲集富庶情形甲於諸衛原設衛城爲方三里三分僅容祠廟衙署倉庫兵房先年原招戶民二千四百五戶共住房五千餘間俱在東南北三面城垣之外周衛自築護牆以爲屏蔽年來坍塌日甚現經善後事宜案內拆毀另築開四門建造門臺脊房并四面角墩雖尺度減於衛城而嚴翼整煥足資捍禦矣其戶民田地俱在沙州東西北三面離城五六七八十里不等春耕伊始挈眷赴田夏耘秋收婦子散處原野結茅而居澆畢冬水搬回城內終歲勤苦略無寧息田禾歲止一收間種糜穀惟麥稞居多全資黨河之水分引五渠設有木槽比量分寸按定時刻計畝輪灌之法最善黨河上游之南有山名釣魚溝卽沙州東南產金之洞口也尙有大小

紅大小沙諸溝間產金砂及鉛錫硫黃其山綿亘數百餘里路徑叢雜卽西寧甘涼肅並安柳赤靖諸處路路可通乾隆二年有奸徒合夥偷挖旋經搜捕審結現在添設卡路撥兵巡查以資防範其西南之推莫兒兔每年輪派參遊都司帶兵三百名十月前往駐防三月回營此地兩山之中深溝高壘哨探巡防總在相機慎密東北七十里至黃墩堡有都司分駐屬沙州協管轄

### 哈密

哈密者極邊總隘與伊里接壤爲安西門戶西北之巴里坤東北之塔爾納沁皆中外要區南有南湖乃直抵可可砂石之捷徑而回民之三堡當其首衝尤爲巖險自嘉峪關以外取道哈密者有三一出關行臺站路由赤屬之惠回堡靖屬之三道溝柳屬之橋灣經東黃蘆岡尖山子茨窩泉東長流水白笈笈馬蓮井子星星硤紅柳園沙泉子南苦水隔子烟墩西長流水黃蘆岡以達於哈密計程一千三百三十五里沿途皆有塘坊舊存坊店庫陋不堪越郭壁數處惟隔子烟墩一站盡係郭壁更遠一由布隆吉中北路自橋灣經長流水青山子烏喇大泉蘆村泉平池泉貨貨阿卜沙泉子塔爾納沁榆樹溝黃蘆岡以達於哈密計程一千一百里一由安西之白墩子小紅柳園大泉經馬蓮井子傅羅磚井白石頭鏡兒泉北

苦水塔爾納沁黃蘆岡以達於哈密計程八百一十里近因此二路水草雖有沿途並無坊店多由馬蓮井子經走臺站大路哈密三面平夷惟北山屹峙東自塔爾納沁西抵烏克爾綿亘六百餘里塔爾納沁在新城東北二百六十里城約里許開東南二門城中有泉四面皆小山環繞其北四十里有雪蓮坪相傳雪蓮產此者佳今不可多得又西百里有烏喇臺其巔頗平高入雲杪望之儼然若臺雖甚暑雪深數丈山之南麓卽廟兒灣有石洞土屋中有佛像或塑或繪金碧尙存山岡有磚塔清流繞其外頗稱佳境又西百餘里有一排松數里蔥鬱高至數十仞大至數十圍皮厚尺許盡千年物也其下乃東打坂卽所謂南山口昔年大兵駐劄巴里坤在新城西北山後距東打坂一百五十里故稱爲南山乃哈密之北與甘涼肅安一帶南山相距遼遠而夷人俱稱祁連漢名天山其實非一山也又山北有仙人掌一名佛爺掌尖銳高聳冠於羣峯乃伊吾之望云哈密無長河大川沿山溝而流者二十餘道盡皆西向人力引而灌溉者三廟兒灣大小榆樹溝是也餘水出山數里皆伏流或數十里或百里始見而爲泉新城距北山百里東有關干水西有蘇巴什湖夾流十餘里匯於南湖其利甚薄東北八里有蔡巴什湖又名月牙泉西流達於南湖東南一百六十里有長流水稍北五十里有牛尾泉西北六十里有茨梅花湖爲回民牧所頭堡二堡俱有泉三堡

有白楊溝柳樹泉二水南流數里乃合處有廟夷名秦藏經四堡以至五堡回民賴以耕種按肅州志載柔遠縣柳谷水有東西二源出縣東北南流十五里合流今四堡東北之白楊溝柳樹泉二水合流而舊城頗大城內尚有佛廟數處或即昔時柔遠舊治歟再西有沙棗鴨子梯子諸泉凡有卡倫之處無名小泉不可勝紀南湖者諸水滙歸之藪也在新城南三十里折而西約二百里爲郭壁所限湖中秋冬水注積成冰灘春夏乃涸蘆草彌望然非汪洋巨浸不過沮洳浸潤而已新城建於雍正四年在舊城東北隔水對峙周圍二里零高三丈四面砲台八座開東西北三門東西門外俱築關廂北即糧城與東關廂同建於雍正十三年西關廂乃民力自築埤堦卑薄不足資屏蔽從前軍興時商賈雲集皆僑寓城中提督樊公奏請城內止住防兵其客民房舍俱給價令遷移城外故城中並無居民而東西兩關遂成市集店舖約三百餘所城以內惟提督協鎮暨糧員駐焉舊城周圍約五里八分零高三丈四面砲臺六十六座開正北東南二門札薩克公於東北倚城築臺以居部郎等亦駐劄於此相傳城係千百年舊址疑即伊吾故郡然亦無可考明初爲元裔忠順王封國嘉靖以後始爲土魯番所有今札薩克公玉素富稱其先人居此十世以時計之似相符合詢其先世事跡自曾祖以前不能言矣我朝封伊祖爲札薩克傳之額敏雍正三年加公爵七年晉封貝子於乾隆四年卒子玉素富嗣照襲封之例降一等封護國公統領部落分爲十三箭每箭頭目一員管領壯丁百五十人凡遇征調力役皆取足於此聞回衆舊有十堡爲準會蹂躪僅存其五餘盡廢尙有南湖等處基址可考現今男婦大小共一萬三千二百餘人舊城居其七其餘五堡乃什之三四每越七日集於舊城北門以資交易客民賴之頭堡在新城正西四十里又西四十里二堡又西四十里三堡堡南里許乃漢城防兵所居築於雍正十年周圍里許南北二門又西南四十里四堡又四十里五堡皆回民所居以耕牧射獵爲生統計地畝約三萬有餘馬牛羊稱是負郭之田多爲公家所有菓園二所最爲蕃茂附近於新舊兩城諸部落更番趨事以供其役人貧而懦蓄積未饒素所然也哈密物候蒸煥泉甘土肥近年亦多雨雪菓有蘋菓葡萄櫻桃桑椹木有松栢榆槐楊柳桑棗花有玫瑰繡毬罌粟芍藥蔬有芹芥蒿苳蔓荊磨菇哈密瓜則其最著者也禽有孔雀黃鸝倭鷄松雞獸有彪豹熊鹿羚羊水獺而野性尤多穀則麥稞糜豆麻子巨勝每歲收成豐稔自十餘分以至五六十分不等皆按種計算者也

# 敦煌隨筆卷下

葉河 常鈞 和亭氏 纂

## 形勢論

安西爲塞外巖疆其地多荒沙大磧郭壁懸灘東則屏護嘉關爲中外之首衝西則控扼番夷爲極邊之鎖鑰南山雪山峙其南疏勒河流環其北南則野馬兔石包城釣魚溝諸隘口俱通柴達木噶斯路徑及青海諸夷游牧處所北則泮帶湖布魯湖一帶邊牆舊址高不過三四尺坍塌不一添設沿邊十八墩并舊墩二座各離汛防遠近不等路通阿濟必濟北套諸夷鎮城東北之堞墩子鹹泉子金溝峽西北之馬蓮井鏡兒泉以及沙州西南之推莫兒兔巴顏布喇西北之可可砂石青墩峽諸處俱通伊里捷徑自大灣設鎮西路之沙州瓜州百齊黃墩東路之雙塔布隆吉靖逆赤金惠回東南之踏實東北之橋灣塔兒灣分設副參遊都司千各員共額設馬步戰兵七千二百名派撥員弁兵丁分守各路塘汛卡墩而標協營堡星羅碁布矣於雙塔布橋靖塔赤惠等處派鎮協等官統領督標固提及延河寧三鎮兵五千名分地駐防又派提鎮協參等官統領甘涼西肅安五鎮兵五千名駐防哈密并

敦煌隨筆卷下

形勢論 戶口田畝總數

一

禹貢學會

邊疆叢書

三堡塔爾納沁等處而遠近要隘哨巡更密矣向來夷使進口皆由臺站中路直達橋灣經靖赤抵嘉峪關乾隆六年夷人懇請進藏熬茶則自北路至橋灣由布魯湖墩經赤金東北海子過赤金湖出野馬免關門循陶賴河東南過烏喇打坂素克拖打坂至西寧之東科爾地方未及進藏仍由原路回巢係奏明行走之路也自乾隆六年議辦善後事宜乃以安西鎮改設提督設添城守營都司靖逆改設副將並酌添橋塔員弁兵丁而犄角之勢立展築添修靖逆橋塔沙州安西城垣護牆等五衛團練屯兵各城堡安設礮位堞墩子馬蓮井等處添墩改站而防禦之制嚴由是赤惠一帶原派防兵五千名全數撤回哈密防兵亦止酌留二千名一歲可省口糧鹽菜盤費賞需各項銀糧若干萬而經費之用舒兼之廣屯種儲積糧和民人慎封守而綢繆之備豫籌邊勝算莫善於此矣

## 戶口田畝總數

安西自分設衛所陸續招戶安插多寡不等及往來僑寓之人類皆五方雜處而陝甘兩省居多邊防風氣剛勁習染成俗率多强悍不馴嗜利輕義而無安土重遷之思所幸邇年屯墾日興田疇彌望閭閻樂業地方漸有起色貨物流通商販工作之流絡繹不絕以戶口而論安西衛原招餘丁九十家現增至一百八十六戶沙州衛原招戶民二千四百五戶柳溝

衛原招戶民餘丁二百一十九戶靖逆衛原招戶民五百六十一戶赤金衛原招戶民二百七十五戶餘丁五十三戶又柳靖赤兵屯原地新招屯民二百二十戶附近兵屯餘地新招屯民八十二戶柳屬佛家營新地新招屯民九十二戶赤金試種官屯現招屯民七十戶以屯墾而論至乾隆七年安柳靖赤四衛共已陞科地四萬四千七百二十八畝零未陞科地二千八百九十五畝零沙州建設之初岳督院原奏可墾地三十餘萬畝內留兵屯地五萬餘畝其餘二十四萬畝請招民二千四百戶每戶給地一百畝嗣於雍正七年間該衛招到戶民二千四百零五戶因地多水少每戶止種近水地五十畝共陞科地十二萬二千五百五十畝又撥安插瓜州之土魯番之纏頭回民八千石籽種之地自瓜州以至小灣南接踏實堡共計四萬畝安西衛經管回屯水利渠夫耕種永不陞科之地一千五百畝又乾隆五年柳靖赤三衛接收改歸民種兵屯原地八千一百五十一畝零查墾兵屯附近餘地三千二百一十八畝零柳赤二屬佛家營鴉兒河白楊河開渠築壩試墾新地共四千三百九十畝又撥給新設渠夫自墾免糧地共四百五十畝以上戶民餘丁舊墾之地或因地氣瘠薄另墾隙地以補原種畝數其他間有隴畔渠稍可沾餘水之地如二道林等處民人試墾者然皆零星不成片段餘水多寡難定實與欽奉恩旨山頭地角悉聽民夷墾種免其陞科之例相符此外地土雖廣水澤不敷難以開墾乾隆五年余因公赴沙查訪黨河上流廣有水泉可以疏引入河開墾地畝詳蒙兩院批令妥辦隨委安西李丞窮源溯流逐細踏勘水泉雖廣然皆逾越郭壁兼有滲沙道里遼遠疏鑿維艱工程浩大詳明批令停止又靖逆之昌馬湖官屯地畝自雍正十一年開墾緣地瘠薄收離靖頗遠中隔打坂駢載甚艱於雍正十三年經劉督院奏明停止雖另有一路可以行車渡河由平口至屯所計程二百餘里出入糧石殊費拮据細訪彼處情形地氣高寒宜青稞不宜小麥若令民人承種則春間籽種口糧搬送既多跋涉秋後收穫糧石駢運更屬艱難恐非輿情所樂從即責成地方官督率稽查而離城僻遠亦慮鞭長莫及正未易詳籌復墾也

### 積糧

糧儲爲足食之原積貯乃籌邊之要總貴綱繆於未雨始免拮据於臨時此地方官最急之先務我皇上宵旰勤民盈寧注念勒諭各直省預爲籌畫凡所以酌議積貯者至詳且備矣余於乾隆四年八月抵任安西體察地方情形竊以安西地處極邊斥鹵苦寒年來關地開屯築渠分水樹藝之利漸興然以屹然雄鎮孤懸於荒沙大漠之中闔鎮之兵食浩繁編民之生齒日盛而西南北三面接近夷戎不通產糧之處關東諸郡輸輓維艱今將招戶添兵

爲億萬斯年之計未便因循苟且止圖遷就於目前也查安西衛設在鎮城存糧無多若計日授餐人浮於食况各屬屯種地畝歲收豐稔未可預期每年青黃不接之時俱需借給戶民籽種口糧設有別項動用勢非倉猝可辦雖安沙靖赤現在奉文採買必俟收割登場酌量應買數目詳明動項奈安西距省計程二十五站道里遙遠及至詳准之日已逾採買之期兼以衛備一人非比州縣設有佐雜可以襄理其每年屯收及採買糧石按季支兵所存有限若但顧目前不議積貯殊非有備無患之道應請撥動司庫銀兩於安西陸續採買京斗糧十萬石不限數目不拘色樣總於秋收後口外價平之時照地方官月報時估及時採買價昂即止現今時屆仲冬請領糧價需時一面酌動道庫存貯銀兩一面移司撥銀歸款所買糧石暫借安西衛倉空廠通融收貯統俟三年後買有成數或搭支兵糧或借給籽種或接濟民食或酌量平糶當臨時妥議詳明辦理出陳易新勿致壅滯虧折其各屬現奉派買糧石仍聽各歸本案自行經理如此儲備則民糶民食俯仰有資極塞巖疆緩急有濟無事輓運之勞可免周章之慮余爲邊儲宜豫起見即於是年九月具稟兩院續經詳蒙鄂督院以安西孤懸塞外積貯最爲緊要批司如議移遵一面動項及時採買自奉文後乾隆四五六七等年陸續採買及屯案扣歸並徵還牛價歸入積貯共有糧七萬二千八百餘石分貯各廳衛倉並議飭交廳衛分管免建道倉以省糜費從此邊儲日漸充實云

### 屯田

乾隆四年鄂督院請稱安西一鎮西塞咽喉必得兵丁精銳始可捍禦邊防今兵丁承種官屯地畝一應差操勢難兼顧請將兵屯籽種地一千六百八十餘石照涼州柳林湖屯田之例以庚申年爲始招募民人及兵丁子弟承種將原派屯兵撤回差操以實營伍其屯田每年所收民得六分官得四分按數輸納以備兵糧籽種牛具料草官爲借給秋收扣還交靖逆通判管理安西道督率稽查其餘可墾地土聽民報墾納糧等語經軍機大臣議覆奉旨俞允於乾隆五年正月內奉文飭辦因靖逆通判一人難以兼顧請委安西同知分辦以專責成績據該廳等會同營員在於柳靖赤三處逐加踏勘丈量除該營報明荒蕪不堪耕種地畝外共接收兵屯原地八千一百五十一畝零又查出近屯餘地三千二百一十八畝零又於柳溝衛屬佛家營等處開渠築壩新墾地二千六百四十畝以上俱招民承種有係昔年開地改歸兵種之原主者有係戶民及兵丁之子弟并親友者有係商賈貿易流寓民人情願認種者有現今挈眷及尙未搬家至招到民戶有一戶止種一戶地畝者亦有一戶力量有餘情願兼種數戶地畝者俱照從前口外招民之例每戶給五京石籽種田地借給牛